



**TEKS UCAPAN PERASMIAN
YBHG. DATO' SRI DR. ALI BIN HAMSA
KETUA SETIAUSAHA NEGARA**

MARI MEMBACA 1MALAYSIA: BACALAH MANJAKU

**11 JANUARI 2013 (JUMAAT)
3.30 PETANG
AUDITORIUM HOSPITAL PUTRAJAYA**

Assalamualaikum Warrahmatullahi Wabarakatuh, Salam Sejahtera dan Salam
1Malaysia.

Yang Berbahagia Dato' Sri Kamaruddin Siaraf
Ketua Setiausaha Kementerian Penerangan Komunikasi dan Kebudayaan

Yang Berbahagia Datuk Kamarul Zaman Bin Md Isa
Ketua Setiausaha Kementerian Kesihatan Malaysia

Yang Berbahagia Dato' Raslin Bin Abu Bakar
Ketua Pengarah Perpustakaan Negara Malaysia

Yang Berbahagia Datuk Dr. Noor Hisham Bin Abdullah
Timbalan Ketua Pengarah Kesihatan Malaysia

Yang Berbahagia Ketua-ketua Jabatan Persekutuan, Pegawai-pegawai
Perpustakaan Negara Malaysia dan Jabatan Kesihatan Malaysia

Yang Berbahagia Datuk-datuk, Datin-datin, wakil-wakil Media, tuan-tuan dan
puan-puan yang dihormati sekalian

1. Alhamdulillah, syukur dipanjatkan ke hadrat Ilahi atas kesempatan dan
limpah kurnia yang dianugerahkan olehNya membolehkan kita bersama-sama
berkumpul dalam majlis ilmu kali ini dalam usaha kita **memantapkan usaha-
usaha untuk melahirkan bangsa Malaysia yang berpengetahuan tinggi
dan maju dalam semua perspektif pemikiran.**

2. Saya mengucapkan terima kasih kepada **pihak penganjur, Perpustakaan Negara Malaysia dan Hospital Putrajaya** atas kesudian memanjangkan jemputan kepada saya untuk bersama-sama menjayakan program pada kali ini. Untuk makluman, saya merupakan seorang penyokong kuat terhadap segala program-program yang bertujuan melahirkan modal insan yang berkualiti seiring dengan aspirasi agar menjadikan Malaysia sebagai sebuah negara maju menjelang tahun 2020..

HALA TUJU PENJAWAT AWAM

Tuan-tuan dan puan-puan sekalian.

3. Suka saya mengingatkan para hadirin sekalian akan **amanat YAB Perdana Menteri** baru-baru ini, yang patut menjadi *guideline* semua penjawat awam dalam menjalankan tugas masing-masing.

- Memastikan **perpaduan nasional** dan jati diri nasional diperkukuhkan;
- Menguruskan **ekonomi** dengan bijak;
- Melaksanakan segala ketetapan dalam **Bajet 2013** secara lancar dan berkesan, mengikut jadual yang ditetapkan;
- Meneruskan **program transformasi negara** (termasuk GTP dan ETP);
- Mengimplementasikan **National Blue Ocean Strategy** (NBOS);
- Mencapai sepenuhnya **KPI** menteri dan kementerian; dan
- Meneruskan usaha menambah baik **sistem penyampaian kerajaan** (*delivery system*) berdasarkan aspek **cepat, tepat dan berintegriti** (CTI).

PEKERJA BERPENGETAHUAN (K-WORKERS)

4. Usaha untuk membentuk Malaysia sebagai sebuah negara maju yang disanjung oleh dunia bukan suatu perkara yang mudah. Penyusunan strategi

ke arah itu terus dilaksanakan dan ditambah baik setiap tahun sehinggakan pada masa ini **Malaysia mula dikenali sebagai negara yang kompetitif**. Ini dibuktikan apabila laporan *IMD World Competitiveness Yearbook 2012* yang telah meletakkan Malaysia di tempat ke-14 daripada 59 negara paling kompetitif di dunia.

5. Untuk berada di tangga tersebut, segala aspek perlu diteliti dan dianalisis sebelum strategi-strategi dilaksanakan. **Kejayaan** yang kita kecapai kini **harus diteruskan** dan strategi perlu sentiasa disusun agar pembangunan negara bergerak seperti diharapkan.

6. Salah satu strategi yang telah dicanang sebelum ini termasuklah **melahirkan warga pekerja berpengetahuan** ataupun *Knowledge Workers*. Kita sedar bahawa bagi sesebuah organisasi, sama ada perkhidmatan awam atau swasta, adalah penting untuk memiliki **kakitangan yang mempunyai pengetahuan tinggi** selain kemahiran fizikal. Pengetahuan yang merupakan perisian atau *software* bagi diri adalah penting dalam membuat pertimbangan dan keputusan sebelum sesuatu tindakan diambil dalam tugas sehari-harian. Justeru itu, **semua penjawat awam** perlu **melengkapkan diri** dengan pelbagai ilmu dan maklumat agar kerja yang dilaksanakan akan menjadi lebih mudah untuk disiapkan.

BACALAH MANJAKU

7. Masyarakat perlulah sentiasa menimba ilmu dan mencedok pelbagai maklumat untuk dijadikan sandaran dalam meniti usia. Oleh itu, saya melihat **program Bacalah Manjaku** ini sebagai satu **program murni** dalam **menggalakkan anak-anak kita untuk mula membaca pada usia yang awal**, yang kemudiannya akan dijadikan **budaya hidup**. Saya percaya generasi anak-anak ini mampu menyambung legasi kejayaan serta melonjakkan nama negara dengan kejayaan yang lebih luar biasa.

8. Saya difahamkan bahawa program ini merupakan **kesinambungan dari 4 program** sebelum ini, yang telah bermula pada tahun 2008 di Hospital Kuala Lumpur, kemudiannya di Hospital Tuanku Fauziah, Perlis (2009), Hospital Umum Kuching, Sarawak (2010) dan Hospital Beaufort, Sabah (2011).

MEMBACA SEBAGAI PROSES PEMBELAJARAN SEPANJANG HAYAT

Tuan-tuan dan puan-puan sekalian.

9. *No matter how busy you may think you are, you must find time for reading or surrender yourself to self-chosen ignorance* (Confucius).

10. **Amalan membaca** merupakan sebahagian **proses pembelajaran sepanjang hayat**. Dalam setiap pembacaan, saya percaya pasti ada pengetahuan baru yang dipelajari sama ada ilmu secara teori ataupun maklumat yang diambil daripada pengalaman yang diceritakan.

11. Dengan adanya warga pekerja yang membaca, kerajaan akan mempunyai warga yang berminda aktif, kreatif dan berfikiran untuk berinovasi selain mengaktifkan minda mereka untuk berfikir dengan lebih waras, fokus, berfikiran terbuka dan mampu melahirkan warga yang berkebolehan melihat sesuatu daripada pelbagai perspektif berbeza.

TRANSFORMASI MINDA RAKYAT 1 MALAYSIA

12. Kerajaan akan **menggerakkan kempen membaca ini secara berterusan**. Bermula tahun 2013, kempen membaca akan dilaksanakan dengan lebih berkesan agar motif kempen dapat dicapai menjelang pembentukan Malaysia sebagai sebuah negara maju.

13. Untuk memastikan proses transformasi kerajaan diperkukuhkan, kempen membaca yang dikenali sebagai **Transformasi Minda Rakyat 1Malaysia** akan diperkenalkan.

14. Sebelum ini, kita telah dimaklumkan bahawa masyarakat Malaysia membaca sekitar 8 hingga 12 buku setahun. Namun begitu, kuantiti bacaan sahaja tidak memadai. Justeru, langkah untuk mendidik masyarakat agar membaca dan menganalisa maklumat yang diperolehi perlu dijalankan serentak.

15. Pada hari ini, ledakan maklumat terutamanya di alam siber tidak dapat lagi dibendung. Jutaan maklumat mampu dicapai oleh pembaca setiap hari menerusi pelbagai gajet elektronik yang disambungkan kepada sumber maya tanpa sempadan. Jika dilihat dari sudut positif, maklumat yang pelbagai dan mudah diperolehi ini amat bermanfaat kepada seluruh masyarakat. Hal ini juga dapat menjamin usaha mewujudkan masyarakat berilmu ataupun *knowledge based society*.

SUDUT BACAAN SEMPENA PROGRAM BACALAH MANJAKU

16. Sudut-sudut bacaan telah diwujudkan di lokasi-lokasi terpilih semata-mata untuk menggerakkan warga kerja secara khususnya dan masyarakat Malaysia secara amnya untuk mengamalkan amalan membaca. Sebagai contoh, satu sudut bacaan diwujudkan di Wad Pediatrik Hospital Putrajaya hari ini. Saya **amat memuji usaha** pihak Hospital Putrajaya dan Perpustakaan Negara Malaysia dalam untuk mewujudkan sudut bacaan ini. Selain untuk kegunaan pesakit dan juga pelawat, ia juga boleh dimanfaatkan oleh warga kerja wad berkenaan. Perkara yang sama juga harus dilaksanakan di organisasi-

organisasi lain agar kesedaran kepentingan membaca dapat disampaikan kepada seluruh masyarakat secara menyeluruh dan jayanya.

HARAPAN DAN PENUTUP

Tuan-tuan dan puan-puan,

17. Di kesempatan ini, saya ingin menggalakkan para hadirin sekalian untuk **melibatkan diri** dalam **aktiviti-aktiviti *Corporate Social Responsibility* (CSR)** seperti ini dan juga dalam **aktiviti-aktiviti kesukarelawan seperti 1Malaysia For Youth (1M4U)**, kerana ia merupakan sebahagian daripada sumbangan kita sebagai rakyat negara ini kepada pembangunan masyarakat. Disini juga, saya ingin **mengucapkan terima kasih kepada sektor swasta** kerana bersama-sama dengan sektor awam dalam menyumbang kepada aktiviti-aktiviti seperti hari ini.

18. *Insyallah*, semoga Transformasi Minda Rakyat 1Malaysia dapat kita laksanakan dalam hasrat melahirkan modal insan kelas pertama seiring dengan strategi yang telah disusun dalam membentuk Malaysia sebagai sebuah negara yang dipandang tinggi. **Perpustakaan Negara Malaysia** sebagai badan induk menggerakkan program-program kesedaran kepentingan membaca **tidak boleh berdiri sendirian tanpa kerjasama daripada pelbagai pihak** sama ada daripada organisasi mahupun secara individu kerana walau seberapa banyak tindakan telah dihasilkan, namun kesan pada penghujungnya kembali bergantung kepada diri sendiri sama ada ingin membaca atau sebaliknya.

19. Amalkanlah membaca di mana-mana selagi ada masa dan ruang yang membolehkan kita melakukannya kerana membaca itu mudah dan dapat dilakukan dimana-mana. Malah, agama Islam juga menekankan konsep

membaca, di mana wahyu pertama yang diturunkan oleh Allah s.w.t. kepada Nabi Muhammad s.a.w. melalui malaikat Jibrail bermula dengan perkataan *iqra'*, yang membawa maksud, bacalah.

20. Melalui harapan itu, saya dengan lafaz *Bismillahi Rahmani Rahhim*, **merasmikan Program Bacalah Manjaku di Hospital Putrajaya**. Sekian, *Wabilahi Taufik Wal Hidayah, Wasalamualaikum Warahmatullahi Wabarakatuh*.